

1 Tesalonika

Pol-qa bugukhokhof pepa, Klisten bawan ezoqam-te, ndigu Tesalonika taon-te giyagam

Megeat Manqat-qase

Pol nqanek bugukhokhof pepa, Klisten bawan ezoqam-te gepeawam, ndigu Tesalonika taon-te giyagam, ta khøuwa-te ndøgo, ndego Kolin taon-té gegoám. Tesalonika ndøgo, taon kandambaqape ndøgoám. Masedonia manqei-té, neka ndaola-té.

Pol qambo-misika, manqei vinivinimba-te ge-okhoam, ezoqa Mbumbukiam-qa Manqat ge:zømesimam, ndego até Tesalonika taon-té-a, vøgoam (Kel 17:1-14). Yaq teqa nømendim mokho-te, ezoqa nøme møndø-unimanqatiním. Ezoqa kopokopo nøme ndigu, Zu bawan-ák. Geté ezoqa kopoáv, ndigu bawan vini-ák. Ndigu Zu ezoqa nøme, ndigu Yesu unimanqatinteav qagoam, ndigu Klisten ezoqam, ngenøgim-té ginø-abumám. Pol taqa yaq-te ge-ewag, ndego Timoti ndøkhofotáv ti-te, ngenek tiqa unimanqatin-te, zita tøpøzu manqat vømøzø-ein. Yaq taqa zitate, Timoti nqawa gendovesez, ndego Pol tiqa matev eqeieqei-qa yaq-te vømbøe-votot. Yaq Pol nqanek pepa ndakin, nqánek gene-peawám: Tiqa unimanqatin-te, zita tøpøzu nøme nonqó. Neka ndego tiqa bevap, løvøte neka Yesu-qa qavane-qa yaq-te, vøzømbë-qavøiu.

¹ Nqanek pepa, no Pol neka Sailes neka Timoti, ni nipeaomít. Zo-té qeitø-peaomít, zo Klisten bawan ezoqam, Tesalonika taon-te ndozoyage, zo Mbumbukiam, ndego Tat, neka Evezøza, Yesu Keliso, tiqa mokho-te ndozotu:gu.

Mbumbukiam-qa kuku matev neka sambi matev, ndøgoát, zo-te.

*Pol-qa ike manqat Mbumbukiam-te, Tesalonika
Klisten bawan ezoqam-qa yaq-te*

² Ni zoqa yaq-te qeiguligulimatun, ni Mbumbukiam ike manqat oskia nimbo-manqaté, zo ezoqa ewaqape-qa yaq-te. ³ Niqa guligulimte, Mbumbukiam-te, nigi Tat, ni oskia teimbotamatavupatún ndøgo, av zo Yesu Keliso ndøzøte-unimanqatinat, neka zoqa sasae-qa yaq-te, ndøgo kuku matev-us ndozogo, neka zoqa føgøføgakh waniap-qa yaq-te, zo nigi Evezøza Yesu Keliso-te ndozoto-taza.

⁴ Nøfuap, zo Mbumbukiam ndezømbo-khafuat, ni mòtinøtéén, ndego zo møndø-vevesám, vozötegi-ezoqam-ez. ⁵ Zapa ndøgo, ni Manqat Mbomambaqape qeindapavun, ndøgo ambá av nqægo, manqat mba ndøgeavün. Geté bazaføgakh neka Nqova Mbomambaqapé namba me:geavún. Yaq zo áv qazøte-qeivím nqægo: Niqa manqat unimanqatín. Zo møzøte-zøtéz, ni zo mokho-te ande áv khatiyagam. Ni zo nitigoám. ⁶ Ezoqa nøme, zo føgakh-te ambá gini-abumám. Geté zo niqa matev neka Evezøza-qa matev,

zòmbo-paevém neka manqat khanakhanakh-us vozōndapem. Ta khanakhanakh ndøgo, Nqova Mbomambaqape-té qando-okhó. ⁷ Yaq ta mokhote nqanek, ezoqa ewaqape, Masedonia neka Akaya plovins-te, Yesu ndi-unimanqatinat, ndigu zoqa matev eqeieqezi me:vewé neka paev-qa ndøgó. ⁸ Evezøza-qa manqat, zo ezoqa qazozø-manqatam, ambá av nqægo, Masedonia neka Akaya plovins-te mbā qanø-panqavøēm. Geté manqei-manqei ate ndægo, ezoqa ewaqape, zoqa unimanqatin-qa yaq-te sùgumu-ewagát, ndøgo Mbumbukiam-te ndøzøgo. Ni ti-te ndigu, manqat einiav tøgoat, kopømbá. Zapa ndøgo, ndigu møndøyogém. ⁹ Ndigu ekezan, emanqat møndæ-vototupatún, av zo ni qazøte-khatomb, ni zote qeigeavun, neka zo tae khøuwiap-te qazogoam, unimanqatin khandi Mbumbukiam-te ande áv khazøtē-qambuz, ndego zo ndakin ndozombovizap, ¹⁰ neka zo tege Yo Yesu ande áv khazømbøē-keoge, yan-te tendovis, ndego Mbumbukiam løvøte-te gekhandi:v, yaq ndego ni Mbumbukiam-qa manqa ovøyam-te, teqa qaqa-te vøkhandi:n.

2

Pol Tesalonika taon-te, Mbumbukiam-qa Manqat ge:zømesimam

¹ Nøfuap! Zo zøkeza møzøte-zøtéz, ni zo-te qeigeavun, ni ambá av nqægo, khokhō seigeavün. Geté mokho kandambá qafakhan. ² Zo møzøte-zøtéz, ni bugukhokhof Filipai taon-te qeigoam, ezoqa ni gèngiænotám, neka vøi-potonumam.

Yaq ni zo-te qeitøndu-niav, ni ezoqa nøme, niqa manqa manqate-te tokømbem-qa nigoám. Geté Mbumbukiam ni møndøni-töké, neka ni zo teqa Manqat Mbomambaqape, kha føgakh-mba vøizø-manqatam. ³ Ni ezoqa manqa qeizø-løvutatun, ni ambá av nqægo, khokho manqat nizø-manqatē o matavap soqøsoqa nigū o ezoqa khavozam-qa nigū. ⁴ Geté ni Mbumbukiam møndø-gevenó neka ezoqa eqeieqei vøenæmb, neka teqa manqat, niqa zenda-te vō:ve. Ni teqa manqat qeimanqatun, ni ambá av nqægo, ezoqa khanakhanakh asøtøve-qa nizøgō. Geté ni Mbumbukiam khanakhanakh asøtøve-qa nimbogó, ndego niqa mbøni neka matavap ndini-gevwat. ⁵ Zo møzøte-zøtéz. Ni ambá av nqægo, ezoqa enaq nizøge:mām o khanakhanakh manqat vøizø-etoumam, yaq moni-qā nizømbi-goām. Mbumbukiam møndæ-otév, nqanek manqat unimanqatín. ⁶ Ni ambá av nqægo, nikeza iz eqawat-qa nizøgoām, zo niqa iz tozoni-eqatat, o ezoqa nøme vøní-eqatāt. ⁷ Ni Keliso-gi u-anim nqeigu, ni tøni-poein, ni ambá nizø-pouweín, av nqægo, zo ni ezoqa kandakanda zöténæmbát. Geté ni zo mokho-te qeigoam, ni matev aiyaiyav-té qeitøgoám. Ni zo qeizø-kewagam, ni andé evo me nitigoám, ndugu nakheis tete nduzø-etoam. ⁸ Ni kuku kandambá zo-te. Yaq ni ambá av nqægo, zo Mbumbukiam-qa Manqat Mbomambaqape mba niti-zømesimām. Geté ni até nikeza yagé-a, vøizø-etoam. Zapa ndøgo, ni kuku khàpe nimbi-khouwév zo-te. ⁹ Nøfuap! Zo ndozombo-matâváp, ni sasae føgakh-

qape qeikhazat, zo mokho-te qeigoam. Ni pavpave nekā lovølova, sèisasaetám, neka niqa yage nonqo, moni vøi-qaqasumam. Zapa ndógo, ni Mbumbukiam-qa Manqat qati-zømesimam, ni poeveáv, ni zogi ezoqa kopo-te sa teito-tambet, viniv vøizø-etoám.

¹⁰ Zo møzøte-zøtéz neka Mbumbukiam vøetev, ni zo namba qazi:yagam, ni āv tøtiyagám, av Mbumbukiam ndømbøe-poev. Ni matev eqeieqeité qeitøyagám neka manqa-zapa-qase goneáv. ¹¹ Neka zo møzøte-zøtéz, ni zo ezoqa kopokopo-te, ate ndøzøte:go, āv teizømbe-matønumám, av eve nde:go, ekeza nakheis-te te:matønumat. ¹² Ni zo nìgugubám neka zita vøizø-tøpazam neka vøizø-pouweam, av nqægo: Zo āv tøneyagé, av Mbumbukiam ndømbøe-poev, ndego zo teqa megeat matev-te neka waev kandambaqape-te ndezø-akhayam.

Klisten ezoqam, matev føgøføgakh ambá qazømbe-fakhanumám, geté ndigu føgakh-mbá giwaniapám

¹³ Ni Mbumbukiam, ike manqate oskia nimbo-manqaté. Zapa ndógo, zo teqa manqat qazoyogem ni-te, zo ambá av nqægo, khokho sozondapém, av ezoqam-qa manqat sa ndozo-upøgim. Geté zo Mbumbukiam-qá Manqat zondapém. Yaq ndøgo unimanqatín. Nqanek manqat, zoqá mokho-té qanu-sasaeát, zo ndozo-unimanqatinat. ¹⁴ Nøfuap! Matev ndøgo, zo te qafakhanam, até kopó, av Mbumbukiam-gi Klisten bawan vinivinimba qazømbe-fakhanumam,

ndigu Zudia plovins-te, Keliso Yesu-qa mokho-te ndu:gu. Žogi ezoqam, zo matev soqøsoqa, āv gizømbe-matønumám, av Zu ezoqam, Zudia plovins-te ndøgo, Klisten ezoqam-te gizømbe-matønumam. ¹⁵ Ezoqam ngínik, nigi Evezøza Yesu neka Mbumbukiam-gi manqa vevezam ezoqam, løvøte-te gi-abumam neka ni vøngiænotam. Mbumbukiam khanakhanakh mbaín ti-te. Neka tiqa matev qaqa-ús, ezoqa ewaqape-te. ¹⁶ Ndigu ni tokømbem-qa nigoám. Ni bawan vini-ák, ambá nití-zømesimák, yaq ndigu vøe-khandí:z. Ta mokho-te ndøgo, ndigu manqa-zapazapa nøme mba mo:kapuimít, atema vømøtøvā. Geté Mbumbukiam-qa qaqa khakheitáp. Segezó-fakhán.

Pol Tesalonika ezoqam-te, nqawa vesezam-qa gegoam

¹⁷ Nøfuap! Ni zo qeizuvaz, yaq khapémbá qa-auwam, ni vao kandambá qeigoam, zo-te. Neka ni zoqa bugug nqawa qeivi-qa nigoám. Unimanqatín. Ni qámbá zo-te. Geté niqa matavap-te neka mbøni-te, ni namba zi:gu.

¹⁸ Ni zo-te nqawa okho-qa nimbogoám. No Pol, no khøuwa kopoáv, ambá notøndo-navín, zo-te. Geté Saitan ni gètokømbemám. ¹⁹ Nigi Evezøza Yesu tendoqavan, yaq ni gekham-qā yaq-tē qeitø-tāmb neka gekha mokhō qatí-khambuvemém neka teqa megemege-te ndo:go, khanakhanakh-us vøtíwanat? Ndøgo zo zøkhapús. ²⁰ Unimanqatín. Ezoqam zó, ni nqati-khambuvap neka khanakhanakh nqāní-āsøtøvē.

3

¹ Ni kopømba mbain qagoam, sekemba amba qati-kewagam, yaq ni matavap ãv qatigoném nqægo: Ni nikezan, Atens taon-te até nitøkhæsokhoát. ² Geté ni Timoti nitøndú-khofotøvém, zo-te, ndego nigi Klisten nøfu, ni Mbumbukiam-qa sasae namba nqati-sasaeat, ndego ni Manqat Mbomambaqape manqa manqate-te ngini-tøke, Keliso-qa yaq-te. Yaq ndego zo tèabezømbe-tøké neka zita zótøpáz, zoqa unimanqatin matev bezømbé-føgakh. ³ Soqaín ndøgo, matev soqøsoqa ndøgo, zo-te qafakhanam, zoqa unimanqatin matev tøkukugim. Zo zøkeza møzøte-zøtéz, matev soqøsoqa av nqægo tøndo-okhoat, ndøgo Mbumbukiam-qá poév, ni-te. ⁴ Ni zo namba qatigoam, ni møizø-manqatám, av nqægo, “Ni matev føgakh-qape, ndízimø-qeivím.” Yaq zo møzøte-zøtéz, matev møndø-fakhanám. ⁵ Yaq nakembá, no kopømba mbain qagoam, sekemba amba qate-kewagam, no Timoti notøndo-khofotáv. No nøtenat-qa nøgoám, zoqa unimanqatin matev, ãv khapezømbégo-a. Soqaín ndøgo, ndego ezoqam, ndego ezoqa nde:khamasim, zo te:khamasim, yaq niqa sasae føgakh-qape, zo mokho-te qeikhanazat, vømø-khokhō.

⁶ Geté ndakin Timoti nango gendovesez, zo-te gegoam, ndego zoqa unimanqatin matev neka kuku matev-qa yaq-te, manqat mbomambaqape ndø-ndapavún. Neka ndego ni ãv ginimbi-eín nqægo: Zo ni oskia zoni-mataváp,

khanakhanakh-ús, neka zo vao kandambá ni-te. Neka zo ni nqawa nømende-qa zogó, ate avté, ni zo nqawa zømete-qa nqati:gu. ⁷ Nøfuap! Ni yage føgakh-qape-te nqeiyage, ezoqa matev soqøsoqa ngini-matanam, yaq Timoti zoqa unimanqatin-qa yaq-te emanqat ginimbi-votot, ndøgo ni møqæ ni-etoám. ⁸ Yaq ndakin niqa yage kopømbaqapé. Zapa ndøgo, ni møtinøtén, zo Evezøza mokho-te, bazaføgakh-ús ndozowaniap. ⁹ Ni khanakhanakh kandambá, zoqa yaq-te. Ni nøtenateáv, Mbumbukiam zoqa yaq-te, ike manqat eqeieqeí ande áv kheimbøé-einím. ¹⁰ Pavpave nekā lovølova, ni Mbumbukiam-te oskia nivi:matún. Bazaføgakh-ús. Ni zoqa bugug nango båniqeivím neka zo manqat nøme batzømesim, ndøgo zo zøtezateav ndøgo, neka zoqa unimanqatin matev bezømbé-khouwev.

¹¹ Ni áv qati-guligulím nqægo: Mbumbukiam, ndego nigi Tat, neka nigi Evezøza Yesu, ndigu niqa nakhoa ekeza ndøkhakheinømém, ni zote teitøndu-niav. ¹² Neka Evezøza, zoqa kuku matev gezø-khouwév, yaq ndøgo kandambaqape ndøgoát, yaqyaq-a nekā ezoqa nøme-te, ate avté, ni zo-te kuku nqanimbi:gu. ¹³ Yaq ndego zo gezøtøké, zo bazaføgakh-us zówaniapát. Yaq zo Mbumbukiam-qa megemenge-te, ndego nigi Tat, manqa-zapazapa-yav neka eqeieqeí-qape sozøgoát, ta khøuwa-te ndøgo, nigi Evezøza Yesu, ekeza ezoqam ate ndi:gu namba, tendoqavan.

4

Yage eqeieqei-qa yaq-te, av Mbumbukiam ndømbøe-poev

1 Nófuap! Manqat nøme nqánek: Ni zo mòti-zømesimám, ande áv khazøté-yagát, yaq Mbumbukiam khanakhanakh vømbøé-asøtāv. Ni mòtinøtéén, zo áv tøzøte-yagé. Yaq ndakin ni zo nízøviám, neka nigi Evezøza Yesu-qa iz-te, manqat áv qazimbí-løvuá nqægo: Ta matev-te ndøgo, zo vøfisám. **2** Zo møzøte-zøtéz, nigi Evezøza Yesu-qa iz-te, zo gekha manqat niti-zømesimam. **3** Mbumbukiam-qa poev nqánek: Zo ndaføyamba-qape ndøyagé neka mambe okho matev, kha mbokhanøzám. **4** Neka zøkeza kha gèqeiví. Matev eqeieqei-té qayagé, av Mbumbukiam ndømbøe-poev.* **5** Ezoqa me:govèsám, av bavokho ezoqam ndi:matanam, ndigu Mbumbukiam zøtezateav ndigu. **6** Khafeap ndøgo, Mbumbukiam geve, ndøløvuám. Qoge Klisten qafu-te, manqa-zapa ndøgö, tegu zas voqó-aqonøvém. Evezøza yaq-fia ndøtá, ti-te ndigu, matev av nqægo ndimatanam. Ni zo møizø-manqatám, neka vøi-gugubam. **7** Mbumbukiam, ni ambá av nqægo, manqa-zapa gone-qā nimbi-akhā. Geté ni ndøgo tinimbí-akhá: Ni ndaføyamba-qape zíyagát. **8** Yaq nakémbá, gekha ezoqám ndego, nqanek nømendim manqat ndesanqwae, ndego ambá av nqægo, ezoqam-qā manqat ndøsanqwé, geté ndego Mbumbukiam-qá manqat ndøsanqwé, ndego zo ekeza Nqova

4:3 4:3 1 Tes 5:23; 1 Pita 1:16 **4:4** 4:4-5 1 Ko 6:13 * **4:4** 4:4
 Mokho nøme nqánek: Zo angana, zøkeza sakheis eqeieqei zøkeogé.
 Vizap-ús. Ate av-té, Mbumbukiam ndømbøe-poev. **4:7** 4:7 1 Pita
 1:15-16; Iblu 12:14 **4:8** 4:8 Luk 10:16; 2 Ko 1:22

Mbomambaqape ndezø-etoam.

9 No zo-te, kuku matev-qa yaq-te, Klisten bawan ezoqam mokho-te, manqat nøme peaweaav tøgoat, ndøgo kopømbá. Zapa ndøgo, zo Mbumbukiam ekeza me:zømás, zo kuku ãv khazømbé-goät, yaqyaq-a. **10** Neka unimanqatín, zo kuku ndøzøgó, Klisten ezoqam-te ate ndi:gu, nandav Masedonia plovins ate ndægo. Nøfuap. Ni manqat ãv qazimbí-løvuá nqægo: Zoqa kuku matev, bëkhouwevtét.

11 Zo bazaføgakh ndø-asøzú. Matev eqeieqeit-é qayagé, neka zøkeza yage mba ndøndapét. Neka zøkeza zendá qane-sasaeát, ate av-té, ni zo qati-gugubam. **12** Zo matev av ndægo tozogoat, yaq bavokho-ak zo ndøzøvizám neka zo ezoqa nøme-te zotótabák, lou neka gigiap-qa yaq-te.

Evezøza tendoqavan, taqayaq-te

13 Nøfuap! Ni poeveáv, zo ndigu Klisten ezoqam-qa yaq-te zøtezateav tøgoat, ndigu gipakhaez. Soqaín ndøgo, zo mbøni tøzøvavat, av ezoqa nøme ndi:gu, ndigu Yesu-te vintøzateav ndigu. **14** Ni ãv qazi:-unimanqatinát nqægo: Yesu møndønaním, neka nango vøkhandi:v. Yaq ni ate nqánek qazi-unimanqatinát: Ndigu Klisten ezoqam, gipakhaez, Mbumbukiam Yesu namba ndé-upozó, ndego tendoqavan.

15 Manqat ndøgo, ni ndakin teizø-ein, Evezøza ekeza ndø-eín, av nqægo: Ta khøuwa-te ndøgo, ndego Evezøza tendoqavan, ni ezoqam, zua nqaziyage, ni ndigu ziløvubák, ndigu

bugukhokhof go:pakhaetat. ¹⁶ Zapa ndøgo, manqat bazaføgakh-us-qape ndówáv, neka enzol ezoqam-gi kawa ezoqa nøme vø-akhā neka Mbumbukiam-qa kipi wag vópā. Yaq Evezøza yan-té gendóvís. Yaq løvøte ezoqam, ndigu Keliso gi-unimanqatinim, ndigu bugukhokhof løvøte-té gindúsúz. ¹⁷ Yaq taqa zita-te, Mbumbukiam, ni zua nqaziyage, gékhatómb, vø-eqanō, ti namba ndigu, løvøte-te gindusuz. Khaiya ozozté genøkhatómb, yaq ni ova nqo:go, Evezøza namba vizimø-qaqandám. Yaq ni Evezøzá namba zí:yagát, miavmiav. ¹⁸ Zo yaqyaq-a, nqanek manqat, zita me:tøpøzú.

5

Yesu gendøqaván. Ni é-bizi-khakheinám

¹ Nøfuap! Ni zo taqa yaq-te manqat peaweav tøgoat, gekha khøuwa neka gekha viav Yesu tendoqavan, ndøgo kopømbá. ² Zapa ndøgo, zo møzøte-zøtéz, Evezøza-qa Khøuwa, ndego tendoqavan, andé aqonam ezoqam me mé:geáv, lova khoev teqa-nqawa. Nakhamas-té. ³ Ezoqa géqaqavét. Neka áv giní-manqatát nqægo, “Ni sambi matev-té qaziyagé. Fofogeap mbaín.” Geté ndigu nqova zóndáf. Ezoqa ngiæzoat matev, ande sævam-qa nqosøgeap, gui-ovain, nakhamas-té qanøzø-fakhán. Yaq ezoqa kopømba mbaín tikhokhoz.

⁴ Geté zo, nøfuap, zo ambá av nqægo, bøivun-té qazoyagé. Yaq nakémbá, ta khøuwa kopømba mbaín, zo ande aqonam ezoqam me, nqova

tøzøndaf. ⁵ Zo ate ndøzøte:go, zo waev neka paveat-gí ezoqám. Ni ambá av nqægo, lova neka bøivun-gí ezoqám. ⁶ Yaq nakémbá, ni bizi-sømbiápét, kopømba ande av ezoqa nøme ndi:gu. Geté ni oskia bžizio-feanoát neka niqa kha eqeieqei bizinøzøgím. ⁷ Ezoqa ndigu, ndisømbiam, ndigu lovølova ndøsømbi:matún. Neka ezoqa ndigu, ibøkha soqa ndi-izam, ndigu lovølova ndø-izumatún. ⁸ Geté ni paveat-gí ezoqám. Yaq nakémbá, ni nikeza kha, eqeieqei bizinøzøgím. Ni unimanqatin matev neka kuku matev binigú. Matev av nqægo, andé sanqava khakhazam nonqó, savim-te taqambo-tøkeat. Neka niqa vintønat matev Yesu-te, av nqægo, ndego ni gékhandí:n, ni andé nakhag ezoqam-qá wawaq me bizi:-uzáp. ⁹ Ni Mbumbukiam, ambá av nqægo, ndøgo tene-vevendám, ni qaqa nígū, neka vøngiænō. Geté ndego ni ndøgo tene-vevendám: Ni Yesu Keliso mokho-te gékhandí:n, ndego nigi Evezøza. ¹⁰ Yesu ta zapaya nqánek genenaním: Ni té namba bizi:yagé, oskiá ndøgo, ni e-ma tizio-pakhaen o tiziyagat, ndego tendoqavan. ¹¹ Yaq nakémbá, zo yaqyaq-a, zita ndøtøpøzú neka unimanqatin-te vøtøkeam. Ate av-té, ndakin ndøzøte:go.

Pol-qa vaev guguna manqat

¹² Nøfuap! Ni āv qazimbi-viám nqægo: Zo megetapak ezoqam, gèzøvizáp, ndigu zoqa Klisten bawan mokho-te, sasae bazaføgakh-us nandigu, ndigu zo nandizømbo-megetap neka nandi-guguza,

Evezøza mokho-te. **13** Zo ndigu møe-mbá sozozó-vizupát neka kuku kandambá sozozó-goát, tiqa sasae zapaya. Neka zo yaqyaq-a, sambi bèzøgó.

14 Nøfuap! Ni manqat nøme ãv qazimbí-løvuá nqægo: Ezoqam ndigu, ndiwauwi:zat, gèguguzá. Neka ndigu, kha foggakhateav ndigu, neka ndigu, tiqa unimanqatin-te foggakh mbain ndigu, gèzøtøkeé. Neka aiyaiyav matev ndøgó, ezoqa ewaqape-te. **15** Gèqeiví, av nqægo: Ezoqa manqa-zapa tego zo-te, zo ndego ta manqa-zapa ndøgó, mbøe-qavøinám. Geté zo yaqyaq-a, matev mbomømboma oskia ndømatanám, neka até ezoqa ewaqape-té-a, matev mbomømboma vozó-matønumát.

16 Zo khanakhanakh-us oskia ndøgó. **17** Neka oskia ndøguligulím. **18** Neka gekha matév ndøgó, tøzø-fakhanumat, zo Mbumbukiam ike manqat mbo-manqaté. Matev av nqægo, Mbumbukiam-qá poév, zo-te, zo Keliso Yesu mokho-te ndozotuyage.

19 Zo Nqova Mbomambaqape, nakhoa mbøe-khakhàzám, ndego zo mokho-te nandu:-sasaeat.

20 Nqova Mbomambaqape, ezoqa nøme-te manqat tevevezam, yaq ndego ezoqam zo te:zømas, ta manqat ndøgó, ndøsanqawém. **21** Geté zo manqat ate ndægo vøgeveaném neka vøqeivim, nqanek manqat Mbumbukiam-tē qapøtendé-wav-a. Yaq manqat ndøgó, unimanqatin tøgoat, zo vøndapém.

22 Geté matev soqain ate ndægo, zo zósanqawém.

23 No āv qate-guligulím nqægo: Mbumbukiam, ndego ni sambi matev ndini-etoam, zo tèabete-khakheinovém, teqa bøi-te vøzoté-ndaføyamba-ēz. Neka ndego zoge nqova neka zoqa matavap neka zoqa kha, eqeieqezi tèabete-khatiwí. Yaq zo manqa-zapazapa mbaín, sozogoát, nigi Evezøza Yesu Keliso tendoqavan. **24** Mbumbukiam, ndego zo gezøndo-akha, ndego unimanqatín. Ndego ndømatanám.

25 Nøfuap! Zo até ní-a, gønindu-guligulím.

26 Zo tozo-møvabat, zenda kaka vø-itiamát, Klisten zøfuap ate ndigu namba, neka vøngenøndamat, ate av-té, Mbumbukiam-qa bøi-te eqeieqezi ndægo.

27 No Evezøza-qa iz-te, nqazó-pouwe: Zo nqanek pepa, Klisten ezoqa ewaqape-té qazonó-geveømém.

28 Nigi Evezøza Yesu Keliso-qa kuku matev, ndøgoát, zo-te.

**Mbumbukiam-qa Manqat Mbomambaqape
Ruth, Jonah, and the New Testament in the Kuni
dialect of the Kuni-Boazi language of Papua New
Guinea
Rut, Jona, na Nupela Testamen long tokples
Kuni-Boazi long Niugini**

copyright © 2015 Wycliffe Switzerland

Language: Kuni-Boazi

Dialect: Kuni

Translation by: Wycliffe Switzerland

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-08-20

PDF generated using Haiola and XeLaTeX on 11 Nov 2022 from source files
dated 18 Oct 2022

f10a11c4-6a0c-5775-9168-c6e73df1a68f